

աւտնդման կտակ արար հեծեծանօք սրտին, լալով ա-
 չացն, ակնարկելով բարեկամացն հուպ նստելոց. Ո՛վ
 բարեկամք իմ, ասէ, ողորմեցարո՛ւք ինձ, ողորմե-
 ցարո՛ւք, զի ձեռն Տեառն մխեցաւ յիս: Եւ այսու
 զհեծութիւն սրտին ընդ ձայնին հիւսէր և ասէր. Ո՛վ
 փառաւոր որդեակք իմ, զիա՞րդ ոչ եղէ արժանի ա-
 ռաքել զԱստուածաշունչ յիշատակն իմ առ Հոգեւոր-
 տէրն և կարօտ մնացի յաւրհնութենէն: Ո՛վ ցանկալի
 որդեակք իմ, զիա՞րդ ի ցանկալոյն Սուրբ Յակոբայ
 զրկեցաւ աղգ Հայոց և ոչ մեռայ լսելով խլացեալ ա-
 կանջ իմ զլուրն բօթալից: Ո՛վ ըղձալիք իմ, զիա՞րդ
 մեկնեցայ յըղձալոյն յեղիազարէ, եւ չկայ մերձ զի
 մխիթարեսցէ, եւ զիա՞րդ ոչ աղիողորմ արձակեմ
 ողբս մնալն նորա անպատեհ տեղիսն և թափառական
 շրջիլն. քակտաւ հոգիս մեծ ցաւոյ զիպիլն նորա եւ
 է մարմինս ցաւալից, աչս արտասուալից: Ո՛վ սիրե-
 լիք իմ, զգացուցէ՛ք ինձ, ո՞ւր է սիրելին իմ Մար-
 տիրոս հռետորն՝ եղբայրն Եղիազարու: Թէպէտե ի
 նմանէ զրկեցայ, փոխանակ եղբօրն զկարգս իմ նա
 կատարեսցէ կանգնեալ ի վերայ գլխոյ իմոյ եւ յան-
 ձինս մեղսալից: Ո՛վ յոգնատենչդ իմ Տէր Մարտիրոս,
 կատարեա՛յ զամենայն կտակս իմ այսպէս. նախ առ
 դիրս վարդապետացն արա՛յ զչիրիմս իմ, նաեւ զգիր
 յիշատակացն ի վերայ իմ, զի ընթերցեալ այնու յի-
 շեսցին զհոգս հողացեալ, գոնէ ըստ բանին ողորմու-
 թեան՝ գացէ ողորմութիւն յաւուրն աներեկի յողոր-
 մածէն անձն իմ ցաւօք մեղաց ախտալից: Ո՛վ հո-
 գիածին որդեակք իմ, թէպէտ և ոչ ըստ մարմնոյ ըս-
 տացայ, գոհութիւն մեծ կամեցողին զայս, տնկեսջի՛ք
 ի վերայ գլխոյ իմոյ զծառ աճարի(*) ըստ սարասի ի-
 մոյ բնատի, թէպէտեւ անպտուղ նմանի, յինքեան

(*) ԼՈՒՍ. ՕՍՈՐ զՐՃԷ. օհլամուր: